



BASTIAN NEVACHO

La premiaa tragedia occitana de Diego Anghilante continua a virar per las valadas

Arriba en Val Sant Martin, a **Pomarèt**, lo vir de la tragedia en lenga occitana *Bastian Nevacho* de Diego Anghilante. L'òbra, presentaa al concurs "Premi per un texte teatral en las lengas del Piemont" e premiaa da la Region Piemont ental 2011, serè rapresentaa **venre 27 de setembre del 2019 a 21 oras** en la sala Teatre Vaudés en Via Carlo Alberto, en ocasion des "Jornaas des lengas minoritarias" d'l'Escòla Latina. Lo texte, premiat ental 2011 decò en la seccion teatre del *Gran Jo Flourau* del Felibrige francés, es estat publicat ental 2012 dal Centro Studi Piemontesi de Turin sensa jamai èsser rapresentaa fins que, ental 2018, l'autor abo quaque actor amator e mairelenga des valadas Estura e Grana a decidut de presentar al public l'òbra teatrala.

Gracias a Espaci Occitan, e abo l'important sostenh de la Region Piemont, es naissut lo *Teatre de la flour* per l'adaptament de *Bastian Nevacho*. S'es cernut de presentar una seleccion de passatges, liats da la votz de l'autor que, en italian, es lo narrator que companha entre las diferentas scenas.

Bastian (Sebastiano Degiovanni, dich *Nevacho* per sobriquet de familha) es un "marrit" que ista ent'un país des autas Valadas Occitanas al principi de lhi ans '70, quora l'emigracion e lo parelh dich progrès esbrison per sempre la societat d'la civiltat alpina. Bastian, lingièra de mesa etat que viu entre rebellions chumias, chocas e prepotenças sensa capir aquò que se passa dedins e dentorn a nele, es un perdent, e sa vita es dominaa, coma ent'una tragedia antica, da la mòrt, dal torment e da un destin sensa sens. Lo drama trucha un argument delicat ent'una lenga occitana preciosa, que mescla paraulas anticas e rafinaas a autras grossièras e popolaras, ente s'entreçon lhi registres dramatic e realistic. Da part d'Espaci Occitan, un novèl empenh en la valorizacion de la lenga e de la cultura occitana a través lo teatre, forma d'art pas tament propongua en las valadas.

L'intrada es gratis. L'òbra teatrala es pensaa per un public adult e preparat a una istòria dramatica.

Regia e votz narranta Diego Anghilante; actors Claudio Franco, Manuela Damiano, Marco Parola, Guido Garnero, Luciana Ortu.

L'iniciativa es realizaa abo la collaboracion de l'Associacion "Amici della Scuola Latina" e d'la Comuna de Pomarèt, e es una anteprema des Jornaas d'l'Escòla Latina dediaas a las lengas minoritarias del jorn d'après, sande 28 de setembre, qu'a en programa un laboratòri de paleografia, un convenh sus lhi documents en occitan ental bas Medioevo e en la premièra etat moderna des Alps Occidentales e lo ser un concert de chants tradicionals. Coma tuchi lhi ans la diamenja serè dediaa a la cultura materiala, abo l'inauguracion d'la mòstra "L'industria tessile in Val Chisone".

Per informacions sus l'espectacle Espaci Occitan: www.espaci-occitan.org, segreteria@espaci-occitan.org, Fb @museooccitano, Tw @espacioccitan, tel 0171904075.